



Qafar Ummattah Party

Afar People's Party

Maybalaalaqà Agda-baxisso 20,2018

### **Itopiyal Qafar leh tan amo gexxa taqabitte**

Itopiyal away gexsitak geytimta siyaasa gubak daga dimokraasih asqassaabeh qusba uguugut fixixisak geytimta. Naharsi malaak Dr. Abiyi Acmad inkittiino kee geysis takke yaabitte abak geytima. Siyaasah casbisen marak tu currik kah tawqannah tekkeeh, Baaxo caddol ummatta faxoot aytikumussaah, niya takeemik sugte. Takkay ikkah sissik waktih kukta ugsaanamaay, uxih siyaasà casbimeynit inkih yayyaaqenim kee Agat caddoh wagari kee walal kah yakkannah abaanam ux waktih addat takkem faxximta abtoota kinni. Itopiyal Saay diggoysak inki gide neh yakke dadal yamaatuh takkem faxximta asqassaabe elle takkem faxxintam Xisoosah asqassabeey, Saay exxaay, Qadaalat kee Doorro Borxi kinni.

Naharsi maaqattay baaxo caddol baxa'baxsa le exxat naharsi malaak abe gufneena qafar caddol meqe oggol geyte. Ta caddol Qafar ummatta qambbalak sugtem naharsi malaak Dr. Abiyi Acmadat yanggoroweniih, sinni taqabitte kee sinnih niyaatanamat kaalluk walalanamak sugte. Gufneenak qambbaalimtam baaxoh caddol ummatta fanat sugte dareemite baysaanam dubuh hinnay, baxsa luk naharsi malaak ayyuntiino qidaddooy, siyaasa caddol tan caalotal inti qiduh cato kaah akkele. Takkay ikkah naharsi malaakat yanggoroweenimih fayxi kak temeetem uxih gexot geytimta qidaddo kee doolati gabat agleh wayto le kabuk tan xukko kinni.

Qafar rakaakay itopiyak hanggi akah acee ween rakaakayittek foocat geytima. Siyaasah umaane kee umaaddoobi Qafar ummattal ayyuntiino, qidaddo kee dariifa taqabitte kataysak geytimta. Manggo gaba dacarsittoh xiinah kak tan ummattay, axcih 85% takke ummattak manggo mara doolat kee doolat axawah tan gadda leela elle sugen baaxok ken yeyserran. Tah elle tekkem kaaduk baaxok kalan marah elle raaqan arooca kee ken cakki keenih acee kalah, garab buqreh xiina kah yakken innah tu keenih akke kalah kinni. Awash weeqaytut caxan summiy qaafiyatah faxxiime sinni kee Cuduud booditte qafar ummatta a'afuk geytimta taqabitte fanak edde yabna dagoom kinni. Tahak gexaak, Qafar rakaakay Itopiyal geytimma inta rakaakayittek widir raaqe rakaakay kinni.

Qafar Ummattah Parti ta taqabitey Qafar afuk geytimta siyaasa kasaaratat axawah taniimil taamine. Baxaa'baxsale taqabitte Rakaakayitteh adak tawqe way, calli teetik inkih tan Itopiyal dimokrasi daabisaanama. Toysa, raqte Itopiyah ummatta curriyat geyta waqdi Qafar kaaduk curriyat geele. Tah kaaduk neek kalah tan Itopiyal inki gide nakuh, qadaalat kee curriyat daabimuh, siyaasah tanguille maritteh fanat yakke sittalluk abit elle diggosna sumaq kinni. Qafar Ummattah Parti Dr. Abiyi Acmadak taamah abina meqe intit katata, xer uddurih asqassabe kee xayii uddurih asqassabe abbinoowelem qaagitna.



**Qafar Ummattah Party**

**Afar People's Party**

Qafar Ummattah Parti rakaakay caddol sissik calli kah faxxiima ximmooma ahak gubal xayyosse:

1. Xer tummabul sinnih, umaadobat finqiteh tan Abbobtiy EPRDFik exak teynat qalla lek xintoh qalaamatitte keddemanuy, baritto le qunxaaneyta miraacinul kabba hewanamay, taama ginaanamih duda aalewanamay, etc. kinnim tambule; Tatre 27 sanatah reedal yan mari ummatta faxxam bicsoonu maduudinnon. Tahama EPRDF fayxi ikkah, Qafar ummattah hinna;

2. Qafar rakaakay, “Agar killilih” migaqaal ahak wadir bisoh gexam mafaxximta. Tahama EPRDF 9 rakaakayitney tanik 5 rakaakay malak irot elle tabbixe gurra kinnim tascasse. Tah isih baxsa luk fanti doolat kee rakaakayitte fanih baxsa baar bahsiisseleh, toohimi sittin way kee bood aymagele. Tohuk gexaak EPRDF kee QDAP gexso sissikuk gaba kaltam faxximta;

3. Qafar rakaakayak cedma firisaanam faxximta doolat caddol: mango waqdi ummatta fanat takke boodittek - Qafar kee Tigre; Qafar kee Qiisa; Qafar kee Oromo; Qafar kee Amcara - ugutu cedma qaduk amixxige waytaama. Toobokoh tan ummatootih fanat faxxiime waa gurral sehadayti baxih rooci bayak geytimam abaluk asna kulli gamuk. Qafar Ummattah Parti ta caagidil mango adda tuktubeh kaxxa bohoy lem tiyssixigeh immayi ta warkat edde firisna waktih fana tu makkinnam nable. Agat kee Qafar rakaakayih cadol inkih xakak axawah edde yanim ta taqabiy aqrat yabixen kinniimil naamine. Naharsi malaak Dr. Abiyyi Acmad dudda haamal xayi waktih addat cedma firisso taama abdiqelem qaagitna. Qafar rakaakay kee cuggaaneenah raqta ummattay toobokoh tanih fanat ta taqabi afdiguk xakak yamaatuh taamitelem qaagitna;

4. Awash weeqaytih summisiyyi yaaduh takke giclo: Awash weeqayti Qafarak rooci axawah edde yan weeqaytu kinni. Ta lee yaqubeenih, tonnah kaaduk ken saqi ta lee yaaqube. Buqre caddol sinni buqre ta leek yafqen. Awash weeqayti tama dariifal sigtah tan ummattah baxsa luk Qafar ummatta kee Oromoh ummattak mano kinni. Takkay ikkah ta weeqaytut caxan industritte wasak lee summisak geytimtam tanbule. Summisen lee amo gexak sehadayti baxih qaafiyatal mango biyaakitte katassa. Qaafiyat malaakih oyti elle yascassennal Qafar rakaakayal alaaqa kee inonti biyaakitteey, tonnah kaaduk edde koositu duudan biyaakittek inkihik fayya elle itta rakaakay kinnim qadooyse. Takkay ikkah ta caagidik Qafar rakaakayih doolat kee federaal doolat inkih tibba betten waya, Qafar Ummattah Parti mangom elle tuktube hangi kah yaceeni gideh. Tohuk ugutak, Naharsi malaak Dr. Abiyi Acmad weeqayti summisiyya yamniqem dubuk hinnay weeqaytut yassifiyeenimih project daabisam qaagitna ;

5. Elle sugen guubuk kaskih yeyserran marih catoo kee qusubuk ken nookisaanimih essero : Qidaddo kee bisoh maxcok exxak teena axcuk xissimte kasam kappanna kee tindaho sokkar projektitte edde anuk manggo projektitte tama dariifal tan ummattal kaxxa gibdaabina kataysak geytimta. Agat caddoh Odit parlamah xayyosse oytal sookar buqre uma'adoba kee abini igiimak gexxaamah kaxxa kasaaratat culitem tiysixxige waya, Qafar dacarsittoh xiinal maqiishat caddol kaxxa taqabi katasse. Qafar ummatta issi xinto kee baaxot kafimuh tan ummata kinnih, toh tet



**Qafar Ummattah Party**

**Afar People's Party**

Madqat axawah tan. Takkay ikkah ta ummatta labbak keenih raqte baaxok caylah yeyserranim dibuk hinnay doolatak hebelto cato mageenon. Naharsi malaak Dr. Abiyyi Acmadak essernam ta ummata qusubuk nookisaanam kee edde yaqisheenim aracat keenih hanaama ;

6. Qabaarat koossitoonuh duddale mingil daabisaanam faxxiimta : Qafar ummatta silayti milaagut xaggimtah tan ummattak foomat geytimta ummatootit tan. Tatreh yan qabaarat Qafar dacarsittoh xiina umannah tumuttukeh sugte. Tahaay дума tumbulleh amixxige wayta gurral saqi yebbexeemik gexaak Qafar ummata kaxxa tussina kee xixibaane tibixxe, toh elle takkem too waqdi Itopiyak « qidaddoh dadalal » kaxxa aytile wakti. Naharsi malaak Dr. Abiyyi Acmadak essernam qagaaqagtah yan qabaarat ummatta koossittu duddale mingil soolisam ;

7. Qafar rakaakayal fulte qaskar dagoosanamih essero : Qafar rakaakay Itopiyak kaxxam kalali qandde elle manggoh tan rakaakay kinni. Tanna leemik Qafar rakaakay kee ummattà manggo carbih gadda tekke. Fulte qaskarih mano uma xinto bahte ; ummatta baatilih casbisaanah qidaanam tanbule. Tah kaaduk tama dariifal meysi kee xakak wayti katassam kinni. Eretriya kee Itopiyah fanih cuduudih calli Qafar rakaakayal fulte qaskar dagoosselemil naamine. Tohuk gexaaka Naharsi malaak Dr. Abiyyi Acmadak essernaama ta dariifak qaskar kalam kee Eretriya kee Itopiyah fanih sittin way bicsaama, tah baaxo caddol meqe xaloot baahaleemih taagah.

Qafar Ummattah Parti uxxih cubbi abitah, Naharsi malaak culeh yan xagana aracat haam fan giclo bisoh beeleh, takkay ikkah taham fan beeh yan maaqatta meqe intit nable.

Qafar Ummattah Parti